

Prome Minister mr. Evelyn Wever-Croes:

E prome paso den innovacion di enseñanza a wordo duna na Scol Cacique Macuarima

ORANJESTAD (AAN) -- Gobierno di Aruba a tene su prome conferencia di prensa semanal, Dialuna, den cual a participa Prome Minister mr. Evelyn Wever-Croes, y sr. Dangui Oduber, titular di Turismo, Salubridad Publico y Deporte. Como prome punto di agenda e mandatario a haci enfasis riba e tema di innovacion y digitalizacion den enseñanza. Dos otro tema no menos importante cu e dignatario a trata, ta e situacion na Venezuela y un update di e asunto di e refineria.

INNOVACION DI ENSEÑANZA:

E prome paso a wordo duna siman pasa, cu introduccion di "Learning project" na Scol Cacique Macuarima. Minister Presidente a expresa cu naturalmente tin retonan financiero cu ta stroba gobierno pa haci inversionnan grandi den enseñanza mesora, pero a cuminsa cu un proyecto piloto na Scol Basico Cacique Macuarima.

E dignatario a splica cu su persona y minister Lampe, titular di enseñanza, a

identifica e proyecto aki como uno unda lo percursa pa e klasnan haya e borchinan digital, pa nan haya del nan local di computer aparatonan cu ta traha, pasobra den mayoria di scol tin local pero no tur computer ta traha.

E meta ta pa na un forma hopi simple siña e alumnonan for di klas 1 te 6de klas con pa atende cu computer y digitalizacion, na un forma responsable, pa evita cu nan por bira victima di talvez haci hopi wega y cosnan cu por stroba nan les. E mandatario a reitera cu tambe lo provee e alumnonan di gadgets (dispositivo) mas moderno, manera google, etc.

Prome Minister a subraya cu logicamente mester percursa pa e klasnan aki tin seguridad, pa no yama sentimentonan negativo di malhechor. Ademas airconan pa mantene e ekiponan den condicion.

Minister Presidente a subraya cu sin duda tur scol na Aruba lo kier un proyecto asina. Pero a cuminsa cu un proyecto piloto atravez di Futura, cu ta yuda gobierno cu innovacion, y no ta cuestion di djis pone



un hardware, sino cu mas importante ta e tipo di les cu lo wordo duna, unda lo enfoca mas riba e aspectonan tecnico, materianan STEM cu ta consisti di Ciencia, Tecnologia, Ingenieria y Matematica. Y lo enfoca riba esaki for di chikito te na grandi pa asina por stimula nos hobennan pa sigui den e direccion aki. Minister Presidente a subraya cu tur docente ta entusiasma cu e proyecto y nan ta dispuesto pa haci e trainingnan pa "bay mee" cu e proyecto.

E dignatario a acentua cu no ta solamente e cabesante y e docentenan ta entusiasma

cu e proyecto, pero tin un comision di mayor hopi activo, cu ya caba a percursa pa tur e fundraising pa instalacion di coriente y pa upgrade e posibilidad pa por atende cu e computernan aki. E mandatario a subraya cu ora tin un comision di mayor asina entusiasma y involvi, e tin mas confianza cu e muchanan tambe ta bay cuida locual cu nan ta bay haya, y sa di aprecie.

Minister Wever-Croes a splica cu Scol Cacique Macuarima no a haya mucho inversion pa largo tempo y gobierno a scoge e scol aki pa diferente motibo. E

dignatario, pa conclui, a gradici Parlamentario Edgar Vrolijk cu a presenta e proyecto ora el a scucha di dje y a insisti pa e scol haye; Minister Lampe cu a permiti pa introduci esaki den e Plan Nacional di Enseñanza, y cu ta cuadra cu e Plan di Innovacion Nacional di Enseñanza, y cu ta cuadra den e Plan Educacion Nacional cu el a lanza siman pasa, den cual digitalizacion ta hopi importante. Un bez cu e proyecto piloto drenta den ehecucion e lo wordo evalua y siña di e eronan cu por wordo cometi, pasobra semper tin foutnan cu por siña di nan, anto asina por implementa e proyecto den otro scolnan. E proyecto aki ta operacional na comienzo di e aña escolar nobo, pero lo purba di hacie prome pa cumpli cu un promesa haci na e alumnonan di 6de klas cu ta hopi contento, pero cu ta bisa cu nan ta bay y no ta bay wak e proyecto. Gobierno lo percursa pa nan logra. Innovacion den enseñanza ta e prome paso pa gobierno empodera nos mucha y hobennan, pa e trabaonan di futuro.